

Ahern, Adams eta Hume bat etorri dira Ipar Irlanda baketzeko konpromisoan

Londresko Gobernuak Eskoziako Legebiltzarraren proposamena aurkeztu du

Ipar Irlandan bake iraunkorra lortzeko eta Irlanda osoa justizian eta berdintasunean oinarrituta adiskidetzeko konpromisoa» dutela adierazi zuten atzo Bertie Ahern Irlandako lehen ministroak, Gerry Adams Sinn Feingo buruzagiak eta John Hume Alderdi Sozial Demokratikoa eta Liberalaren buruzagiak.

Agentziak / Dublin-Londres

HIRU buruzagiak atzo goizean bildu ziren Dublinen, eta bilaren ondoren agiri bateratu bat kaleratu zuten. «Berriro diogu erabat konprometituta gaudela gure arazo politikoak bitarteko baketsuak eta demokratikoak soilik erabiliz konpontzeko; eta aitortzen dugu arazoa unionistek parte hartuta eta haiekin ados jarrita soilik konpon daitekeela», adierazi zuten Ahern, Adams eta Humek agirian.

Ipar Irlandako alderdi politikoek irailaren 15ean hasiko dituzten elkarrizketak «arrakastatsuak» izateko itxaropena dutela azaldu zuten hiru politikoei.

Ahern lehen ministro irlandarra bilera amaituta esan zuen Dublin eta Londres erabat konprometituta daudela irailaren 15ean hasiko diren elkarrizketekin. Irlandar Armada Errepublikarrak (IRA) su-etena orain aste-bete eskas indarrean jarri zuenez gero, Sinn Feinek bake elkarrizketetan parte hartuko duela azpimarratu zuen. Ahernek argi utzi zuen harrera egingo diola berarekin hitz egin nahi duen Irlandako edozein alderdi politikori.

Adamsek adierazi zuen irailaren 15ean bake elkarrizketetara



Gerry Adams, Bertie Ahern eta John Hume atzo Dublinen.

PAT MAXWELL / EPA

hurreratuko direla «mahai gainean jartzeko gure ikuspuntu errepublikanoa, eta beste ikuspegia dutenei entzuteko». Humeren hitzetan, berriz, garrantzitsua da aurretik esandakoak entzutea. «Argi utzi dugu gure helburua dela zatitutako herrian akordioa lortzea, eta arazo horrek ez du konponbidea unionisten akordiorik gabe».

Eskoziaren erreferenduma irailaren 11n • Eskoziako Legebiltzarra eratzeke proposamena aurkeztu zuen herenegun Londresko Gobernuak Komunaren Ganbararen. Proposamenak biltzen du Esko-

zian erreferenduma egingo dela irailaren 11n, herritarrek erabaki dezaten Londresko egindako eskaera onartzen duten ala ez.

Londresko aurkeztutako proposamenaren arabera, Eskoziako Legebiltzarra osatuko dute 129 diputatuk. Edinburgoko Legebiltzarra erabaki-ahalmena izango du hezkuntza, osasun, justizia eta herritarren segurtasunaren arloetan. Zerga alorrean ere ahalmenak izango ditu eta igo edo jaitxi ahal izango ditu % 3ko mugaren barnean. Legebiltzarra independentea izango da Westminsterko Legebiltzarretik.

Proposamenak garbi zehazten

ditu Londresko Legebiltzarraren eskumenak: atzerri gaiak, defentsa, gai konstituzionalak... Londresko Legebiltzarra ezingo ditu baliogabetu Eskoziako hartutako erabakiak: Eskoziako osoan indarra izango dute Edinburgoko foroak hartutako erabakiek.

Azken 400 urteotan Britainia Handiko Legebiltzarra izandako birmoldaketa gogorrena da oraingoa. Proposamena, gainera, ezberdina da 1979. urtean egindakoaren aldean. Hura eskoziarrak baztertu egin zuten, Legebiltzar eskoziarra aurreikusten zuelako baina ahalmen guztiak Westminsterren esku zeudelako. X

Israelek Arafati esan dio ez dutela juduen etxerik eraikiko Jerusalemgo Ras el Amud auzo palestinarrean

Jerusalemgo Udalak onartu egin zuen 132 etxebizitzetatik 70 altxatzen hastea auzo palestinarrean

Agentziak / Jerusalem

BENJAMIN NETANYAHU Israelgo lehen ministroak Jasser Arafat Palestinar Aginte Nazionalako (PAN) lehendakariari jakinarazi zion atzo eki Jerusalemgo Ras el Amud auzo palestinarrean ez dela kokagune judu berririk eraikiko. Yitzhak Moljok, bake negoziaketetan parte hartzen ari den abokatu israeldarra, telefonoz hots egin zion Arafati horren berri emateko, Israelgo irati estatalak adierazi zuenez.

Udalak, Ehud Olmert alkatea buru, herenegun onetsi zuen Olibondoen Mendiaren dagoen Ras el Amud auzo palestinarrean erai-

kiko diren 132 etxebizitzetarik 70 egiten hastea. Erwin Moskowitz milioi juduaren lurretan eraikitzea zen asmoa. Hori jakin bezain pronto Netanyahu Olmertekin bildu zen, bai eta Yitzhak Mordejai Defentsa ministroarekin ere. Israelgo lehen ministroa haserre mintzatu zitzaion Jerusalemgo alkateari, Udalak Gobernuari ezer esan gabe erabaki baitzuen baimena ematea asentamendu judua eraikitzeko.

Ehud Barakek, Israelgo Alderdi Laboristaren buruzagiak, zorianak eman zizkion Netanyahu etzetza emateagatik etxebizitza juduak eraikitzeari. Udalak emandako baimena 70 etxebizi-

tza eraikitzeko «Gobernuaren beste akats bat» dela azaldu zuen Barakek. Iazko irailean Jerusalem gertatutako istiluak gogorazi zituen Alderdi Laboristaren buruzagiak. Orduan Gobernuak baimena eman zuen Jerusalemgo auzo zaharrean dagoen Asmondarren Tunela irekitzeko, eta enfrontamendu gogorak gertatu ziren palestinarren eta israeldarren artean.

Ildo horretakoak izan ziren beste buruzagi politiko batzuen adierazpenak ere. Salaj Tarifek, Barne Gaietarako Legebiltzarreko Batzordearen lehendakari eta gutxiengo drusoaren ordezkariak, «probakazio instituzional-

tzat» jo zuen juduen kokagunea eraikitzeko Udalak hartu zuen erabakia. Meretz fronteko Iosi Sarid lehendakariak ere adierazi zuen erabaki horrek «sua piztuko» duela eta herritar askoren heriotza ekarriko duela.

Palestinarren Herri Gaietarako ministro Saeb Erekat-ek, berriz, proiektua berehala artxibatzeko eskatu zion Netanyahuari.

Janan Poratek, Alderdi Nazional Erlijiosoaren diputatuak, Olmert zoriondu zuen «erabaki egoki eta ausarta» hartzeagatik. «Horrela soilik ezarriko da berriro juduen presentzia eremu horretan, arabiarren bortizkeriagatik alde egin eta gero». X

laburrean

ALBANIA

■ **Fatos Nano lehen ministro, eta Rexhep Mejdani lehendakari**

LEGE BILTZARRAK herenegun Rexhep Mejdani sozialista izendatu zuen lehendakari, eta atzo, berriz, Fatos Nano sozialisten buruzagia lehen ministro. Nanok lehen ministro karguaren zina egin zuen atzo Mejdaniaren aurrean, eta Gobernu berria osatzen duten 22 kideak aurkeztu zituen. Gobernu berriko lehendakariordea Bashkim Fino sozialista izango da, joan den martxoaz geroztik gobernuburu izan dena. X

SERBIA

■ **Hauteskundeak egingo dira irailaren 21ean**

LEHENDAKARIA eta Legebiltzarra aukeratzeko hauteskundeak egingo dira irailaren 21ean, Dragan Tomic Legebiltzarreko lehendakariak atzo iragarri zuenez. Bi hauteskundeak egun berean egingo dira. «Horrela bi milioi dolar aurreztuko ditugu», esan zuen Tomicek. X

KOLONBIA

■ **Samperrek Indar Armatueto buruzagia kargutik kendu du**

HAROL BEDOYA jenerala Indar Armatueto komandante kargutik kendu du Ernesto Samper lehendakariak, eta haren ordeez Manuel Jose Bonnet izendatu du. Izendapen horrekin aldaketa batzuk egin dira goi buruzagitzan militarrean. Gobernuak «Estatu arrazoia» aipatu zituen aldaketak egiteko. Gainera, Hector Pimiento jenerala ere Estatu Goren Bateratuko buruzagitzatik kendu zuen, Kolonbiaren Washingtongo enbaxadarako lan egingo duelako. X

E E B B

■ **Kaliforniako gobernadoreak ingelesez nahi ditu azterketa guztiak**

INGELES behar bezala men-deratzen ez dutenek azterketak gaztelaniaz egiteko esku-bidea dute. Baina Pete Wilson Kaliforniako gobernadoreak aurrekontu estatala blokeatu du ikastetxeetan azterketa eredu berri bat onartzeko exijitzeko, eta azterketa guztiak ingelesez egiteko. Legebiltzarreko demokratek eta irakasleen ordezkariak esan zuten hala bada irakaskuntza publikoko 1,2 milioi ikaslek ulertzen ez duten proba bat egin beharko dutela, eta emaitzak ezberdinak izango direla. X